

M543: Hamburger Beichte

- 10v,1 ich jên mich hiute schuldic deme almehtigen gote unde mîner vrouwen
sancte
- 10v,2 Mariê unde allen gotes heiligen . unde iuch hêre . aller der sünden die ich
ie gevrumete .
- 10v,3 von deme tage daz ich sünden kunde . unde mohte . biz an disen
- 10v,4 hiutigen tac . mit boesen willen . mit boeser bekorunge . mit zorne . mit
nîde
- 10v,5 mit hazze . mit schalkheite . mit valscheite . mit untriuwe . mit
ungeloube mit stolzheite .
- 10v,6 mit hôhverte . mit îtelicheite . mit unmæzlîcher giredede . beide des guotes
unde der êre .
- 11r,1 mit ruome . mit bâge . mit spotte mit lachene mit lûgene . mit swerne mit
verswerene .
- 11r,2 mit afterkoese . mit zierde mîner kleider . unde mînes gebendes daz riuwet
mich . unde
- 11r,3 suochen genâde . ich hân gesündet mit unkiusche gesichte mit unkiusche
hoerene .
- 11r,4 mit unkiusche tastene mînes lîbes gemach ze sêre suochende . ich hân
gesündet
- 11r,5 mit halsende . mit küssene mit unkiuschem willen . mit unkiuschen
worten . mit unkiuschen
- 11r,6 gebærde . mit unkiusche troume . mit überezzene . mit übertrinkende
. mit überkallende .
- 11r,7 mit überslâfende . mit unkiuschheite mînes herzen unde mînes lîbes daz
riuwet
- 11r,8 mich . unde suochen is genâde . ich hân mich versûmet hêre an mînen
gebete .
- 11r,9 an mînen venjen . an mînen gezîte . sô von unmâzen . sô von
mennischlîchen krancheiten
- 11r,10 solicher genâden sô mir got zuo der werlte verluwen hât dere ne schein ich
ime
- 11r,11 nie alsô dancbære . sô ich zuo rehte solte . arme unde unberâtene liute die
ne berihte
- 11r,12 noch en getrôste ich . also ich wole mohte unde ich ze rehte solte . mîner
missetæte
- 11r,13 der ne gewan ich nie sô wâren riuwen noch ne begerte ire nie sô lûterliche
. sô ich

- 11r,14 von rehte solte . unses hêrren lîchamen unde sîn heiligez bluot entvienc ich
nie alsô wirdicliche
- 11r,15 sô ich von rehte solte . ze lîhticheite . unde ze allen übelen dingen daz gotes
- 11r,16 hûs daz ne gesuochte ich nie sô willicliche . sô ich von rehte solte . unde
nie dâ
- 11r,17 inne en gestuont . mit der zûhte . mînes herzen . unde mîner ougen . unde
mîner
- 11r,18 zungen sô ich von rehte solte . bennige dinc unde bennige liute die ne
gemîde ich
- 11r,19 nie sô ganzliche . unde alsô vlîzliche sô ich von rehte solte . mînen
schepfære . unde mînen
- 11r,20 êwarten . unde mînen hûshêren . unde mînen mâgen . unde allen mînen
ebenkristenen . ne wart
- 11r,21 ich nie sô geruoch noch sô holt sô ich von rehte solte . sôwaz ie getete wider
- 11r,22 gotes hulde . unde mîner sêle heil . mit gedenken . mit Worten . unde mit
wirken
- 11r,23 vruo unde spâte . dankes oder undankes . wizzende oder unwizzender . des
mir
- 11r,24 gedenket oder niet en gedenket des giben ich hiute schuldic mich . unseme
- 11r,25 hêrren unde sînen heiligen . unde iuch hêrre . unde suochen es genâde .
unde geloben bezzerunge
- 11r,26 alsô verre sô mir got verhenget . unde mîne mennischliche krancheit
gestatet
- 11r,27 âmen
- 11r,28 disen salmen credidi salt dû singen ze êren ze lobe der heiliger martelungen
- 11r,29 unses hêrren inde der heiligen stillen der hê hatte . dô hê ze deme heiligen
kriuze
- 11r,30 gienc dâr zuo vûnf pater noster . inde daz hê durch die heilige stille alle die
zungen
- 11r,31 betwinge inde gevelle di dir wider sîn . inde dit salt dû tuon tageliches mit
- 11r,32 innicliche Herzen sô hilfet diz daz wizzes wærliche
- 10v,7 dû salt lesen di paternoster inde evangeliô mîner vrouwen sancte Mariê in
die
- 10v,8 êre also der almechtige got si erwelete zuo einer muoter unde zuo
- 10v,9 einer kûningîn über himel unde über erden den Worten dû dîner êren
- 10v,10 niemer entsetzet en werdes .